

Xander tin tur e "makings of a champion"

Minister dr. Richard Visser di bishita cerca Xander Bogaerts



ORANJESTAD (AAN): Dialuna nos astro di base-ball Xander Bogaerts a pasa un dia cu Minister di Salud y Deporte, dr. Richard Visser, cual a inclui un bishita special na Fenway Park, cual ta e stadion di Boston Red Sox na Boston, Massachusetts pa un tour. Aki Minister Visser a cera conoci cu diferente colega y coach di Xander y tur persona cu el a papia e mandatario tabata bisa cu nan ta spera hopi cos di Xander, expresando nan admiracion pa su actitud y dedicacion.

Minister Visser su vision di mira nos hobennan na top di nan carera mundialmente y bon estableci como role modelnan positivo pa nos muchanan ta sigui den su curason. Ora Xander a capta atencion den Major League Baseball, demostrando un talento fabuloso e mandatario a dicidi cu no tin otro forma di felicita Xander si no ta personalmente, na e ciudad cu a brasa nos hoben campeon cu asina entusiasmo, unda su nomber ta resona como un "household name".

Minister Dr. Richard Visser a keda hopi impresionado pa e hoben cu tanto madurez ta desaroyando su carera den Major League Baseball, pero specialmente a gosa su entusiasmo pa cu tur locual e ta experienciando e ultimo simannan cu a pasa.

Canando den Fenway Park, tras di "Green Monster", na e area di e "batting cages", y mas, como dos fanatico grandi di deporte, nan combersacion tabata ameno. Nan a papia tocante su tempo na Aruba, su recorrido pa Minor Leagues y con e ta sinti awendia como un Major

Leaguer. Xander a comparti su prome experiencia hurgando den e stadion di Dodgers cu e mandatario, unda cu el a drenta e stadion cu ta nobo y sumamente grandi y ta bisa cu el a sinti cu e no mester ta eyden y miho nan ponch'e di biaha ya e por bay bek den e dugout.

Minister Visser a subraya cu loke Xander a haci, su exito y hazañanan internacional ta algo historico pa Xander mes, pero tambe pa Aruba. Nan a papia tocante con Xander ta sinti, e yabi di su exito, su mama, tata y famia, como tambe tur hende cu a yud'e. Xander ta un hoben respetuoso, kende sa kico e kier, ta enfoca, tin su meta su dilanti, tin disciplina, ta traha masha duro continuamente y ta concentra su mes riba e parti spiritual tambe, Minister Visser ta conta.

Xander tin tur e "makings of a champion" Minister Visser a conclui. "Mi no tin ningun duda cu e mucha homber aki lo logra algo grandi mundialmente," Minister dr. Richard Visser a subraya.

Minister Visser a expresa su bon deseonan, pero especialmente su sosten y palabranan di admiracion y motivacion pa Xander su trabao duro. E mandatario a hiba pa Xander e mensahe di henter Pais Aruba cu nos comunidad ta stim'e, tur hende ta emociona cada biaha su nomber resona y cu di tur skina, ta resona palabranan di hopi respet pa su talento y dedicacion.

Xander, Aruba ta cu bo!